








盧仝詩集卷第一

月蝕詩

新天子即位五年歲次庚寅斗柄插子律調黃鍾森森  
 萬木夜殭立寒氣鬣肩頑無風爛銀盤從海底出出來  
 照我茅屋東天色紺滑凝不流冰光交貫寒朦朧初疑  
 白蓮花浮出龍王宮八月十五夜比竝不可雙此時怪  
 事發有物吞食來輪如壯士斧斫壞桂似雪山風拉摧  
 百鍊鏡照見膽平地埋寒灰火龍珠飛出腦却入蚌蛤  
 胎摧環破璧眼看盡當天一搭如煤炲磨蹤滅跡須臾  
 閒便似萬古不可開不料至神物有此大狼狽星如撒  
 沙出爭頭事光大奴婢炷暗燈揜感莫如玳瑁今夜吐



燄長如虹孔隙千道射戶外玉川子涕泗下中庭獨自  
行念此日月者太陰太陽精皇天要識物日月乃化生  
走天汲汲勞四體與天作眼行光明此眼不自保天公  
行道何由行吾見陰陽家有說望日蝕月月光滅朔月  
掩朔日日光缺兩眼不相攻此說吾不容又孔子師老  
子云五色令人目盲吾恐天似人好色卽喪明幸且非  
春時萬物不嬌榮青山破瓦色綠水冰崢嶸花枯無女  
豔鳥死沈歌聲頑冬何所好偏使一目盲傳聞古老說  
蝕月蝮蠖精徑圓此里入汝腹汝此癡骸阿誰生可從  
海窟來便解緣青冥恐是睚睫閒插塞所化成黃帝有  
四目帝舜重瞳明二帝懸四目四海生光輝吾不遇二

帝滉漭不可知何故瞳子上坐受蟲豸欺長嗟白兔搗  
靈藥恰似有意防姦非藥成滿臼不中度委任白兔夫  
何爲憶昔堯爲天十日燒九州金燦水銀流玉焜音炒丹  
砂焦焜爲窠遙音堯心增百憂帝見堯心憂勃然發怒決  
洪流立擬沃殺九日妖天高日走沃不及但見萬國赤  
子臙臙生魚頭此時九御導九日爭持節幡麾幢旒駕  
車六九五十四頭蛟螭虬掣電九火輶汝若蝕開齟齬  
輪銜轡執索相爬鉤推蕩轟訇入汝喉紅鱗燄鳥燒口  
快翎鬣倒側聲醜鄒撐腸拄肚礪魄如山丘自可飽死  
更不偷不獨填饑坑亦解堯心憂恨汝時當食藏頭撒  
腦不肖食不當食張唇多多背食不休食天之眼養逆命

安得上帝請汝劉嗚呼人養虎被虎齧天媚蟆被蟆瞎  
乃知恩非類一自作孽吾見患眼人必索良工訣想  
天不異人愛眼固應一安得嫦娥氏來習扁鵲術手操  
春喉戈去此睛上物其初猶勝臘既久如抹膝漆但恐  
功業成便此不吐出玉川子又涕泗下心禱再拜額榻  
砂土中地上蟻虱臣全告愬帝天皇臣心有鐵一寸可  
剗妖蠶癡腸上天不爲臣立梯蹬臣血肉身無由飛上  
天揚天光封詞付與小心風颭排閭闔入紫宮密邇玉  
几前擎坻奏上臣全頑愚曾敢死橫干天代天謀其長  
東方蒼龍角插戟尾掉風當心開明堂統領三百六十  
鱗蟲坐理東方宮月蝕不救援安用東方龍南方火鳥

赤潑血項長尾短飛跋躡頭戴丹冠高達枿月蝕鳥宮  
十三度鳥爲居停主人不覺察貪向何人家行赤口毒  
舌毒蟲頭上喫却月不啄殺虛眨鬼眼明突案按音窻鳥罪  
不可雪西方攫虎立踦踦音斧爲牙鑿爲齒偷犧牲食  
封豕大墓一巒固當軟美見似不見是何道理爪牙根  
天不念天天若准擬錯准擬北方寒龜被虵縛藏頭入  
殼如入獄虵筋束緊束破殼寒龜夏鼈一種味且當臙  
其肉死臙一底板沒信處唯堪支牀脚不堪鑽灼與天下卜  
歲星主福德官爵奉董秦忍使黔婁生覆尸無衣巾天  
失眠不弔歲星胡其仁熒惑矍鑠翁執法大不中月明  
無罪過不糺蝕月蟲年年十月朝太微支虛謫罰何災

凶土星與土性相背反養福德養生禍害到人頭上死  
破敗今夜月蝕安可會太白真將軍怒激鋒鋌生恆州  
陣斬鄺定進項骨脆甚春蔓菁天唯兩眼失一眼將軍  
何處行天兵辰星任廷尉天律自主持人命在盆底固  
應樂見天旨時天若不肖信試喚臯陶鬼一問一如今  
日三台文昌宮作天上紀綱環天二十八磊磊尚書郎  
整頓排班行劔握他人將一肆太陽側一肆天市傷操  
斧代大匠兩手不怕傷弧矢引滿反射人天狼呀啄明  
煌煌癡牛與駮女不肖勸農桑徒勞含淫思旦夕遙相  
望蚩尤簸旗弄旬朔始槌天鼓鳴璫琅枉矢能虵行眊  
目森森張天狗下舐地血流何湧湧譎險萬萬黨架構

名御何可當眯目疊成就害我光王請留北斗一星相  
北極指麾萬國懸中央此外盡掃除堆積如山岡贖我  
父母光當時常星沒殞雨如迸漿似事會事發叱喝誅  
姦強何故中道廢自遺今日殃善善又惡惡郭公所以  
亾願天神聖心無信他人忠玉川子詞訖風色緊格格  
近月黑暗邊有似動劔戟須臾癡葦精兩吻自決折初  
露半箇璧漸吐滿輪魄眾星盡原赦一葦獨誅磔腹肚  
忽脫落依舊掛穹碧光彩未蘇來慘澹一片白柰何萬  
里光受此吞吐厄再得見天眼感荷天地力或問玉川  
子孔子脩春秋二百四十年月蝕盡不收今子咄咄詞  
頗合孔子意不玉川子笑荅或請聽逗逼孔子父母魯

諱魯不諱周書外書大惡故月蝕不見收予命唐天口  
食唐土唐禮過三唐樂過五小猶不說大不可數災沴  
無有大小瘡安引衰周研覈可否日分晝月分夜辨寒  
暑一主刑二主德政乃舉孰爲人面上一目偏可去願  
天完兩日照下萬方土萬古更不瞽萬萬古更不瞽照  
萬古

哭玉碑子

山有洞左頰拾得玉碑子其長一周尺其濶一藥藥顏  
色九秋天稜角四面起輕敲吐寒流清悲動神鬼稽首  
置手中只似一片水至文反無文上帝應有以予疑仙  
石靈願以仙人比心期香湯洗歸送籙堂裏頗奈窮相

驢行動如破鼈十里五里行百蹶復千蹶顏子不少天  
玉碑中路折橫文尋龜兆道理任瓦裂劈竹不可合破  
環永離別向人如有情似痛滴無血勘鬪平地上罅折  
多齧缺百見百傷心不堪再提挈怪哉堅貞姿葱脆不  
堅固矧曰人間人安能保常度敢問生物成敗爲有真  
素爲稟靈異氣不得受穢汚驢罪眞不厚驢生亦錯誤  
更將前前行復恐山神怒白雲翳閉嶺高松吟古墓置  
此忍其傷驅驢下山路一作去

觀放魚歌

常州賢刺史從諫議大夫除天地好生物刺史性與天  
地俱見山客狎魚鳥坐山客北亭湖命舟人駕舫子漾

漾漾菰蒲酒興引行處正見漁人魚刺史密會山客意  
復念網羅嬰無辜忽脫身上殷緋袍盡買罟獲盡有無  
鰻鱸鮎鱧鮪涎惡最頑愚鱒魴見幽風質幹稍高流時  
白噴雪鯽鯉濟此輩肥脆爲絕尤老鯉變化頗神異三  
十六鱗如抹朱水苞弘窟有蛟鼉餌非龍餌唯無鱸叢  
雜百千頭性命懸須臾天心應刺史刺史盡活諸一一  
投深泉跳脫不復拘得水競騰突動作詭怪殊或透藻  
而出或破浪而趨或掉尾子子或奮鬣愉愉或如鶯擲  
梭或如蛇銜珠四散漸不見島嶼徒縈紆鷓鴣鷓鴣鳧  
喜觀爭叫呼小鰕亦相慶遶岸搖其鬚乃知貪生不獨  
頑癡夫可憐百千命幾爲腸中菹若養聖賢真大烹龍

髓敢惜乎苦痛如今人盡是魚食魚族類恣飲噉強力  
無親疎明明刺史心不欲與物相欺誣岸蟲兩與命無  
意殺此活彼用賊徒亦憶清江使橫遭乎余且聖神七  
十鑽不及泥中鱗哀哉託非賢五臟生冤冤讎若當刺  
史時聖物保不囚不疑且不卜二子安能諛二子儻故  
諛吾知心受誅禮重一草木易卦稱中孚又曰鈞不細  
又曰遠庖廚故一作仁人用心刺史盡合符昔魯公觀  
棠距箴遂被孔子貶而書今刺史好生德洽民心誰爲  
刺史一褒譽刺史自上來德風如草鋪衣冠興廢禮百  
姓減暴租豪猾不豪猾鰥孤不鰥孤開古孟瀆三十里  
四千頃泥塊爲膏腴刺史視之揔若無訟庭雀噪坐不

得湖上拔茭植芙蓉勝業莊中二桑門時時對坐談真  
如因說十千天子事福力當與刺史俱天雨曼陀羅花  
深沒膝四十千真珠纓絡堆高樓此事怪持不可會但  
慕刺史仁有餘刺史勅左右兼小家一有奴慎勿背我  
沈毒鉤念魚承奉刺史仁深僻處遠遊刺史官職小  
教化未能敷第一莫近人惡人唯口腴第一莫出境四  
境多網罟重傷刺史心喪爾微賤軀

示添丁

春風苦不仁呼逐馬蹄行人家慚媿瘴氣却憐我入我  
樵悴骨中爲生涯數日不食強強行何忍索我抱看滿  
樹花不知四體正困憊泥及人啼哭聲呀呀忽來案上

翻墨汁塗抹詩書如老鷓父憐母惜摑不得却生癡笑  
令人嗟宿春連曉不成米日高始進一碗茶氣力龍鍾  
頭欲白憑仗添丁莫惱爺

寄男抱孫

別來三得書書道違離久書處甚麤殺且喜見汝手殷  
十七又報汝文頗新有別來纔經年囊盎未合斗當是  
汝母賢日夕加訓誘尚書當畢功禮記速須剖嘍囉兒  
讀書何異摧枯朽尋義低作聲便可養年壽莫學村學  
麤氣強叫吼下學偷功夫新宅鋤菜莠乘涼勸奴婢園  
裏耨葱韭遠籬編榆棘近眼栽桃柳引水灌竹中蒲池  
種蓮藕撈漉蛙蜘蛛脚莫遣生科斗竹林吾最惜新筍好

看守萬籜苞龍兒攢迸溢林藪吾眼恨不見心腸痛如  
搗宅錢都未還債利日日厚籜龍正稱冤莫殺入汝口  
丁寧囑託汝汝活籜龍不殷十七老儒是汝父師友傳  
讀有疑誤輒告諮問取兩手莫破卷拳一吻莫飲酒莫  
學捕鳩鴿莫學打鷄狗小時無大傷習性防已後頑發  
苦惱人汝母必不受任汝惱弟妹任汝惱姨舅姨舅非  
吾親弟妹多老醜莫惱添丁郎淚子作面垢莫引添丁  
郎赫赤日裏走添丁郎小小別吾來久久脯脯不得喫  
兄兄莫撚搜他日吾歸來家人莫彈紉一百放一下打  
汝九十九

自詠三首

爲報玉川子知君未是賢  
低頭雖有地仰面輒無天  
骨肉清成瘦萬蔓老覺羶  
家書與心事相伴過流年

其二

盧子躡踵龍一鐘作也賢愚揔莫驚  
蚊蝥當家口草石是親情  
萬卷堆胷朽三光撮眼明  
翻悲廣成子閑氣說長生

玉川子將終旬月作此詩  
蓋有曳杖起起之知也

其三

物外無知己人間一癖王  
生涯身是夢耽樂酒爲鄉  
日月黏髭鬢雲山鎖肺腸  
愚公只公是不用謾驚張

送王儲詹事西遊獻兵書

美酒撥醅酌楊花飛盡時  
落日長安道方寸無人知  
篋

中制勝術氣雄屈指算半醉千殷勤仰天一長歎玉匣  
百鍊劍龜文又龍吼抽贈王將軍勿使虛白首

送邵兵曹歸江南

春風楊柳陌連騎醉離觴千里遠山碧一條歸路長花  
開愁北渚雲去渡南湘東望濛濛處煙波是故鄉

寄外兄魏澈

何處堪惆悵情親不得親興寧樓上月辜負酒家春

喜逢鄭三遊山

相逢之處花茸茸石壁攢峯千萬重他日期君何處好  
寒流石上一株松

卓女怨

妾本懷春女春懷不自任迷魂隨鳳客嬌思入琴心託  
援交情重當壚酌意深誰家有夫婿作賦得黃金

守歲二首

去年畱不住年來也任他當壚一榼酒爭柰兩年何

其二

老來經節臘樂事甚悠悠不及兒童日都盧不解愁

新月

仙宮雲箔卷露出玉簾清光無所贈相憶鳳皇樓

解悶

人生都幾日一半是離憂但有罇中物從他萬事休

楊子津

風卷魚龍暗楚關  
白波沈却海門山  
鵬騰鰲倒且快性  
地坼天開揔是閑

人日立春

春度春歸無限春  
今朝方始覺成人  
從今尅己應猶及  
顏與梅花俱自新

送尉遲羽之歸宣州

君歸乎君歸興不孤  
謝眺澄江今夜月也  
應憶著此山夫

悲新年

新年何事最堪悲  
病客遙聽百舌兒  
太歲只遊桃李徑  
春風肯管歲寒枝

憶酒寄劉侍郎

愛酒如偷蜜  
憎醒如見刀  
君爲麴蘖主  
酒醴莫辭勞

白鷺鷥

刻成片玉白鷺鷥  
欲捉纖鱗心自急  
翹足沙頭不得時  
傷人不知謂閑立

風中琴

五音六律十三徽  
龍吟鶴響思庖羲  
一彈流水一彈月  
水月風生松樹枝

感秋別怨

霜秋自斷魂  
楚調怨離分  
魄散瑤臺月  
心隨巫峽雲  
蛾眉誰共畫  
鳳曲不同聞  
莫似湘妃淚  
斑斑點點翠裙

新蟬

泉溜潛幽咽琴鳴乍往還長風剪不斷還在樹枝間

題褚遂良孫庭竹

負霜停雪舊根枝龍笙鳳管君莫截春風一番琴上來  
搖碎金罇碧天月

訪含曦上人

三入寺曦未來轆轤無繩井百尺渴心歸去生塵埃

含曦酬

長壽寺石壁盧公一首詩渴讀卽不渴飢讀不卽飢鯨  
飲海水盡露出珊瑚枝海神知貴不知價畱向人閒光  
照夜

客淮南病

揚州蒸毒似燂燂湯客病清枯鬢欲霜且喜閉門無俗  
物四肢安穩一張牀

村醉

昨夜村飲歸健倒三四五摩挲青莓苔莫嗔驚著汝

蕭宅二三子贈荅詩二十首

并序

蕭才子修文行名聞將遷家于洛賣揚州宅未售玉川  
子客揚州羈旅識蕭遂館蕭也未售之宅旣而蕭有事  
于歙州玉川子欲歸洛憶蕭遂與砌下二三子酬酢說  
相媿意俄而二三子有憂宅售心與其他人手孰與洛  
客以蕭故亦有勉強不能逆其情文以見意遂盡錄寄

蕭天知非苟有所欲二三子心遠訥君子蕭乎蕭乎君  
歸不得見者細長三四片者乎

客贈石

竹下青莎中細長三四片主人雖不歸長見主人面

石讓竹

自顧撥不轉何敢當主人竹弟有清風可以娛嘉賓

竹荅客

竹弟謝石兄清風非所任隨分有蕭實無堅重心

石請客

竹弟雖讓客不敢當客恩自慚埋沒久滿面蒼苔痕

客荅石

遍索天地間彼此最癡癖主人幸未來與君爲莫逆

石荅竹

石報孤竹君此客甚高調共我相共癡不怕主人天下  
笑我非蛺蝶兒我非桃李枝不要兒女撲不要春風吹  
苔蘚印我面雨露皴我皮此故不嫌我突兀蒙相知此  
客卽西歸我心徒依依我欲隨客去累重不解飛知弟  
虛心亦待客此客何以共報之

竹請客

我本泰山阿避地到南國主人欲移家我亦要歸北上  
客幸先歸願託歸飛翼唯將翛翛風累路報恩德

客謝竹

揚州駁雜地不辨龍蜥客身正乾枯行處無膏澤太  
山道不遠相庇實無力君若隨我行必有煎茶厄

石請客

啓母是諸母三十六峯是諸父知君家近父母家小人  
安得不懷土憐君與我金石交君歸可得共載否小人  
無以報君恩使君池亭風月古

客謝石

我有水竹莊甚近嵩之顛是君歸休處可以終天年雖  
有提攜勞不憂糧食錢但恐主人心疑我相釣竿

石再請客

主人若知我應喜我結得君主人不知我我住何求於

主人我在天地間自是一片物可得枉壓我使我頭不  
出

客許石

石公說道理句句出凡相<sub>格</sub>知貴知心豈恨主爲客過須  
歸去來旦晚上無厄主人誠賢人多應不相責

井請客

我生天地間頗是往還數已効炊爨勞我亦不願住君  
有造化力在君一降顧我願拔黃泉輕舉隨君去

客謝井

改邑不改井此是井卦辭井公莫怪驚說我成憨癡我  
縱有神力爭敢將公歸揚州惡百姓疑我卷地皮

馬蘭請客

蘭蘭是小草不怕郎君罵願得隨君行暫到嵩山下

客請馬蘭

嵩山未必憐蘭蘭已蘭蘭已受郎君恩不須刷帚跳蹤走只擬蘭浪出其門

蛺蝶請客

粉末爲四體春風爲生涯願得紛飛去與君爲眼花

客請蛺蝶

君是輕薄子莫窺君子腸且須看雀兒雀兒銜爾將

蝦蟇請客

凡有水竹處我曹長先行願君借我一勺水與君晝夜

歌德聲

客請蝦蟇

蝦蟇蟇叩頭莫語人聞聲揚州蝦蟇忽得便腥臊臭穢逐我行我身化作青泥坑

乾隆丙午四月二十一日杭東里人盧文弨校閱

盧仝詩集卷第一

盧仝詩集卷第二

龜銘

龜汝靈於人不靈於身致網於津吾靈於身不靈於人  
致走於塵龜吾與汝靈隣

梳銘

有髮兮朝朝思理有身分兮胡不如是

小婦吟

小婦欲入門隈門勻紅粧妝大婦出門迎正頓羅衣裳門  
邊兩見笑樂不可當夫子於傍聊一作斷腸小婦哆隄  
上高堂開玉匣取琴張陳金壘酌滿觴願言兩相樂永  
與同心事我郎夫子於傍刺欲狂珠簾風度百花香翠

唐三川集卷二  
帳雲屏白玉牀鳴鳥休啼花莫笑女英新喜得娥皇

月下寄徐希仁

夜半沙上行月瑩天心明沙月浩無際此中離思生上天何寥廓下地何崢嶸吾道豈已矣爲君傾兕觥

贈徐希仁石硯別

靈山一片不靈石手斲成器心所惜鳳鳥不至池不成蛟龍乾蟠水空滴青松火鍊翠煙凝寒竹風搖遠天碧今日贈君離別心此中至淺造化深用之可以過珪璧棄置還爲一片石

有所思

當時我醉美人家美人顏色嬌如花今日美人棄我去

青樓珠箔天之涯娟娟姮娥月三五盈又缺翠眉蟬鬢生別離一望不子作見心斷絕心斷絕幾千里夢中醉臥巫山雲覺來淚滴湘江水湘江兩岸花木深美人不見愁人心含愁更奏綠綺琴調高絃絕無知音美人分美人不知爲暮雨分爲朝雲相思一夜梅花發忽到窻前疑是君

樓上女兒曲

誰家女兒樓上頭指揮婢子掛簾鉤林花撩亂心之愁卷却羅袖彈箜篌箜篌歷亂五六絃羅袖掩面啼向天相思絃斷情不斷落花紛紛心欲穿心欲穿憑欄干相憶柳條綠相思錦帳寒直緣感君恩愛一迴顧使我雙

唐詩補  
成轉二字集本缺從全  
唐詩補  
淚長珊珊我有嬌靨待君笑我有嬌娥待君掃鶯花爛  
熳君不來及至君來花已老心腸寸斷誰得知玉階暮  
歷生青草

秋夢行

客行一夜秋風起客夢南遊渡湘水湘水泠泠徹底清  
二妃怨處無限情娥皇不語啓嬌靨女英目成轉心愜  
長眉入鬢何連娟肌膚白玉秀且鮮徘徊共詠東方日  
沈吟再理南風絃聲斷續思綿綿中含幽意兩不宣殷  
勤纖手驚破夢中宵寂寞心悽然心悽然腸亦絕寐不  
寐兮玉枕寒夜深夜兮霜似雪鏡中不見雙翠眉臺前  
空掛纖纖月纖纖月盈復缺娟娟似眉意難訣願此眉

全唐詩校改  
分如此月千里萬里光不滅

自君之出矣

自君之出矣壁上蜘蛛織近取見妾心夜夜無休息妾  
有雙玉環寄君表相憶環是妾之心玉是君之德馳情  
增悴容蓄畏損精力玉簟寒悽悽延想心惻惻風含霜  
月明水泛碧天色此水有盡時此情無終極

走筆謝孟諫議寄新茶

日高丈五睡正濃軍將打門驚周公口云諫議送書信  
白絹斜封三道印開緘見諫議面手閱月團三百片聞  
道新年入山裏蟄蟲驚動春風起天子須嘗陽羨茶百  
草不敢先開花仁風暗結珠琲瑠先春抽出黃金芽摘

鮮焙芳旋封裹至精至好且不奢至尊之餘合王公何  
事便到山人家柴門反關無俗客紗帽籠頭自煎喫碧  
雲引風吹不斷白花浮光凝碗面一碗喉吻潤兩碗破  
孤悶三碗搜枯腸唯有文字五千卷四碗發輕汗平生  
不平事盡向毛孔散五碗肌骨清六碗通仙靈七碗喫  
不得也唯覺兩腋習習清風生蓬萊山在何處玉川子  
乘此清風欲歸去山上神羣仙司下土地位清高隔風  
雨安得知百萬億蒼生命墮在巔崖受辛苦便爲諫議  
問蒼生到頭還得蘇息否

冬行三首

蟲豸臘月皆在蟄吾獨何乃勞其形小大無由知天命

但怪守道不得寧老母妻子一揮手涕下便作千里行  
自顧不及遭霜葉旦夕保得同飄零達生何足云偶然  
苦樂經其身古來堯孔與桀跖善惡何補如今人

其二

長年愛伊洛決計卜長久賒買里仁宅水竹且小有賣  
宅將還資舊業苦不厚債家徵利心餓虎血染口臘風  
刀刻肌遂向東南走賢哉韓員外勸我莫強取憑風謝  
長者敢不愧心苟賃載得估舟估雜非吾偶壯色排榻  
席別座夸羊酒落日無精光啞暝被掣肘漕石生齒牙  
洗灘亂相振奔澌嚼篙杖夾岸雪龍吼可憐聖明朝還  
爲喪家狗通運隔南溟債利拄北斗揚州屋舍賤還債

堪了不此宅貯書籍地溼憂蠹朽賈侯舊相識十年與  
營守貧交多變態僕得君子不利命子罕言我誠孔門  
醜且貴終焉圖死免慙狐首何當歸帝鄉白雲永相友

其三

不敢唾汴水汴水入東海污泥龍王宮恐獲不敬罪不  
敢蹋汴堤汴堤連秦宮蹋盡天子土餽餽無由通此言  
雖太闊且是臣心腸野風結陰兵千里鳴刀槍海月護  
羈魄到曉點孤光上不事天子下不識侯王夜半睡獨  
覺爽氣盈心堂顏子甚年少孔聖同行藏我年過顏子  
敢道不自強船人雖奴兵亦有意智長問我何所得樂  
色填清揚我報果有爲孔經在衣裳

常州孟諫議座上聞韓員外職方貶國子博士  
有感五首

忽見除書到韓君文學官死生從有命人事始知難烈  
火先燒玉庭蕪不養蘭山夫與刺史相對兩巔坑

其二

干祿無便佞宜知黜此身員郎猶小小國學大頻頻孤  
宦心肝直天王苦死嗔朝廷無諫議誰是雪韓人

其三

何事遭朝貶知何被不容不如思所自只欲涕無從爵  
服何曾好荷衣已慣縫朝官莫相識歸去老巖松

其四

力小垂垂上天高又不登致身唯一己獲罪則顏朋祿  
位埋坑穽康莊壘劔稜公卿共惜取莫遣玉山崩

其五

誰憐野田子海內一韓侯左道官雖樂剛腸得健無武  
反功名生地獄禮教死天囚莫言耕種好須避蒺藜秋

夏夜聞蚯蚓吟

夏夜雨欲作傍砌蚯蚓吟念爾無筋骨也應天地心汝  
無親朋累汝無名利侵孤韻似有說哀怨何其深汎汎  
輕薄子旦夕還謳吟肝膽異汝輩熱血徒相侵

揚州送伯齡過江

伯齡不厭山山不養伯齡松顛有樵墮石山無禾生不

認六尺軀遂作東南行諸侯盡食肉壯氣吞八紘不啣  
溜鈍漢何由通姓名夷齊餓死日武王稱聖明節義士  
枉死何異鴻毛輕努力事干謁我心終不平

憶金鵝山沈山人二首

君家山頭松樹風適來入我竹林裏一片新茶破鼻香  
請君速來助我喜莫合九轉大還丹莫讀三十六部大  
洞經閑來共我說真意齒下領取真長生不須服藥求  
神仙神仙意智或偶然自古聖賢放入土淮南雞犬驅  
上天白日上昇應不惡藥成且輒一丸藥暫時上天少  
問天地頭蝎尾誰安著

其二

君愛鍊藥藥欲成我愛骨骨已清試自比校得仙者也  
應合得天上行天門九重高崔嵬清空鑿出黃金堆夜  
叉守門晝不啓夜半醮祭夜半開夜叉喜懽動關鎖鎖  
聲爆地生風雷地上禽獸重血食性命血化飛黃埃太  
上道君蓮花臺九門隔闕安在哉嗚呼沈君大藥成兼  
須巧會鬼物情無求長生喪厥生

寄蕭二十三慶中

蕭乎蕭乎憶蕭者嵩山之盧盧揚州蕭歙州相思過春  
花鬢毛生麥秋千灾萬怪天南道猩猩鸚鵡皆人言山  
魃吹火蟲入椀鳩鳥咒咀鮫吐涎孰就中南瘴欺此客  
憑君數磨犀喫我憶君心千百間千百間君何時還使

我夜夜勞魂魄

贈金鵝山人沈師魯

金鵝山中客來到揚州市買藥床頭一破顏撇然便有  
上天意日月高挂兮關深金膏切淬肌骨異人皆食穀  
與五味獨食太和陰陽氣浩浩流珠走百關綿綿若存  
有深致種玉不耕山外非內粹鑿儒關決文泉彰風雅  
因君不復墜光不外照刃不磨迴避人間惡富貴三日  
四日五六月盤礴化元搜萬類晝飲興酣陶天和夜話  
造微精魅示我插血不死方賞我風格不肥膩肉眼  
不識天上書小儒安敢窺奧祕崑崙路隔西北天三山  
後浮不著地君到頭上憶我時金簡爲吾鐫一字

歎昨日三首

昨日之日不可追今日之日須臾期如此如此復如此  
壯心死盡生鬢絲秋風落葉客腸斷不辦斗酒開愁眉  
賢名聖行甚辛苦周公孔子徒自欺又云骨朽名揚徒爾爲

其二

天下薄夫苦耽酒玉川先生也耽酒薄夫有錢恣張樂  
先生無錢養恬漠有錢無錢俱可憐百年驟過如流川  
平生心事消散盡天上白日悠悠懸

其三

上帝版版主何物日車劫劫西向沒自古賢聖無奈何  
道行不得皆白骨白骨化鬼入泉生人莫負平生年何時

出得禁酒國滿甕釀酒曝背眠

月蝕詩

東海出明月清明照毫髮朱絃初罷彈金兔正奇絕三  
五與二八此時光滿時頗柰蝦蟇兒吞我芳桂枝我愛  
明鏡潔爾乃痕翳之爾且無六翮焉得升天涯方寸有  
白刃無由揚清輝如何萬里光遭爾小物欺却吐天漢  
中良久素魄微日月尚如此人情良可知

直鉤吟

初歲學釣魚自謂魚易得三十持釣竿一魚釣不得人  
鉤曲我鉤直哀哉我鉤又無食文王已沒不復生直鉤  
之道何時行

與馬異結交詩

天地日月如等閑盧仝四十無往還唯有一片心脾骨  
巉巖峯碑兀鬱律刀劔爲峯峒平地放著高如崑崙山  
天不容地不受日月不敢偷照耀神畫八卦鑿破天心  
曾女媧本是伏羲婦恐天怒擣鍊五色石引日月之針  
五星之縷把天補補了三石日不甯歸壻家走向日中  
放老鴟月裏栽桂養蝦蟇天公發怒化一作龍蛇此龍  
此蛇得死病神農合藥救死病一作神農黨龍蛇罰神  
農爲牛頭令載元氣車不知藥中有毒藥藥殺元氣天  
不覺爾來天地不神聖日月之光無正定不知元氣元  
不死忽聞空中喚馬異馬異若不是祥瑞空中散道不

容易昨者全不同異自異是謂大同而小異今日全自  
同異不異是謂全不往兮異不至直當中兮動天地白  
玉璞裏斲出相思心黃金鑛裏鑄出相思淚忽聞空中  
崩崖倒谷聲絕勝明珠千萬解買得西施南威一雙婢  
此婢嬌饒惱殺人凝脂爲膚翡翠裙唯解畫眉朱點脣  
自從獲得君敲金搃玉凌浮雲却返顧一雙婢子何足  
云平生結交若少人憶君眼前如見君青雲欲開白日  
出天眼不見此奇骨此骨縱橫奇又奇千歲萬歲枯松  
枝半折半殘壓山谷盤根感節成蛟螭忽雷霹靂率風  
暴雨撼不動欲動不動千變萬化摠是鱗皴皮此奇怪  
物不可欺盧仝見馬異文章酌得馬異胸中事風姿骨

本恰如此是不是寄一字

馬異答盧仝結交詩

有鳥南翔口銜一書札達我山之維開緘金玉煥陸離  
乃是盧仝結交詩此詩峭絕天邊格力與文星色相射  
長河拔作數條絲大華磨成一拳石莫嗟獨秀無往還  
月中芳桂難追攀況值亂邦不平年迴陵倒谷如等閑  
與君俛首大艱阻喙長三尺不得語因君今日形章句  
羨獼猴兮著衣裳悲蚯蚓兮安翅羽上天不識察仰我  
爲遼天失所將吾劍兮切淤泥使良驥兮捕老鼠昨日  
脫身卑賤籠卯星借與老人峯抱鋤斷地芸芝术偃蓋  
參天舊有松木與松兮保身世臥居居兮起吁吁漱潺

潺兮聆嘒嘒道在其中可終歲不教辜負堯爲帝燒我  
荷衣摧我身迴看天地如砥平鋼刀剗骨不辭去畢躬  
君子今明明俛首辭山心慘惻白雲雖好戀不得看雲  
且擬直須與疾風又卷西飛翼爲報覃懷新結交死生  
富貴存後凋我心不畏朱公叔君意須防劉孝標以膠  
投漆苦不早就中相去萬里道河水悠悠山之間無由  
把袂攄憶抱憶仝吟文能治臭成蘭薰不知何處清風  
夕擬使張華見陸雲

感古四首

天生聖明君必資忠賢臣舜禹竭股肱共佐堯爲君四  
載成理七政齊天文階下藁莢生琴上南風薰輪轉夏

殷周時復猶一人秦漢事讒巧魏晉忘機鈞猜忌相翦  
滅爾來迷恩親以愚保其身不覺身沈淪以智理其國  
遂爲國之賊苟圖容一身萬事良可惻可憐萬乘君聰  
明咸受沈惑忠良伏草莽無因施羽翼日月異又蝕天  
地晦如墨既亢而後求異哉龍之德

其二

人生何所貴所貴有終始昨日盈尺璧今朝盡瑕棄蒼  
蠅點垂棘巧舌成錦綺箕子爲之奴比干諫而死仲尼  
魯司寇出走爲去羣婢假如屈原醒其柰一國醉一國  
醉號呶一人行清高便欲激頽波此事真徒勞上山逢  
猛虎入海逢巨鼉王者苟不死腰下魚鱗刀東海波連

天三度成桑田高岸高於屋斯須變溪谷天地猶尚然  
人情難久全夜半白刃讐旦來金石堅蕭綬旣解坼陳  
印亦棄捐竭節遇刀割輸忠遭禍纏不予衾之眠信予  
衾之穿鏡明不自照膏潤徒自煎抱劍長太息淚墮秋  
風前

其三

古來不患寡所患患不均單醪投長河三軍盡沈淪今  
人異古人結託唯親賓毀坼維鵲巢不行鴉鳩仁鄙悵  
不識分有心占陽春鸞鶴日已疎燕雀日已親小物無  
大志安測棲松筠恩眷多棄故物情尚逐新瓦礫暫拂  
拭光掩連城珍脣吻恣談鏤黃金同灰塵蘇秦北遊趙

張祿西入秦既變嫂叔節仍擯華陽君萬世金石交一  
餉如浮雲骨肉且不顧何況長羈貧

其四

君莫以富貴輕忽他年少聽我暫話會稽朱太守正受  
凍餓時索得人家貴傲婦讀書史未潤身負薪辛苦  
眡生肘謂言琴與瑟糟糠結長久不分殺人羽翮成臨  
臨沖天婦嫌醜  
其柰一朝太守振羽  
儀鄉關晝行衣錦衣哀哉舊婦何眉目新壻隨行向天  
哭寸金石徒爾爲杯水庭沙空自覆乃知愚婦人妬忌  
陰毒心唯救眼底事不思日月深等閑取羞死豈如甘  
布衾

似本不疑

雜興

意智未成百不解見人富貴亦心愛等閑對酒呼三達  
屠羊殺牛皆自在放心爲樂笙歌攢壯氣激作風霜寒  
廚中玉饌盈金盤方丈厭見嫌不食飛鷹躍馬實快性  
脣腐齒爛空噴吐豈期福極翻成禍禍成身誅家亦破  
昨朝惆悵不如君今日悲君不如我否泰交加無定主  
懶學風雲戢翎羽綠酒清琴好養生出將入相無心取  
三五圖書舊揣摩五千道德新規矩

酬徐公以新文見招

昨夜霜月明果有清音生便欲走相和愁聞寒玉聲

招玉川子詠新文

徐希仁

清氣宿我心結爲清泠音一夜吟不足君來相和吟

門箴

貪殘奸酗狡佞訐懷身之八殺背惠恃己狎不肖妬賢  
能命之四孽有是有此予敢辭無是無此予之師一日  
不見予心思思其人懼其人其交其難敢告於門

孟夫子生生亭賦

玉川子沿孟冬之寒流兮輟棹上登生生亭夫子何之  
兮面遂雲沒兮南行百川注海而心不寫兮落日千里  
凝寒精予日衰期人生之世斯已矣爰爲今日猶猶岐  
路之心生悲夫南國濤魚龍畜伏予小子戇朴必不  
能濟夫子欲嗟自慙承夫子而不失予兮傳古道甚分

明予且廣孤目遐賚於天壤兮庶得外盡萬物變化之  
幽情然後慙愧而來歸兮大息吾躬於夫子之亭

盧仝集外詩序

唐玉川先生盧仝履道守正之節見於昌黎退之之文  
當時洛中才名碩德者如溫石二處士咸應辟署吏於  
諸侯惟先生自顧俯仰不能與世合築環堵以居休焉  
遂志而浩浩自娛觀其出處之迹若人哉安可輕量矣  
又傳先生春秋之學舉世莫得見其書故人不得窺其  
涯涘矣但歌詩百篇鏤板已行於世其爲體峭挺嚴放  
脫略拘維特立羣品之外要夫指事措意於救物之爲  
忠憤切深者矣常愛其詩恨不得多見其篇近友人李  
生於道士崔懷玉處又得集外一十五首余甚喜之以  
編附舊本且夫人之愚哲存乎性道之用舍繫乎時儻

氣類乎應上下感會則見諸行事於空言安足貴尚哉  
惜其失志窮時用是欲傳其言耳謹敘其槩以貽於好  
事者云時慶歷八年仲冬望日昌黎韓盈謙甫序

盧仝集外詩

走筆追王內丘

自識夫子面便獲夫子心夫子一啓顏義重千黃金平  
原孟嘗骨已土始有夫子堪知音忽然夫子不語帶席  
帽騎驢去余對醪醕不能斟君且來余之瞻望心悠哉  
零雨其濛愁不散閑花寂寂班階苔不如對此景含笑  
傾金罍莫問四肢暢暫取眉頭開絃琴待夫子夫子來  
不來

思君吟寄生

我思君兮河之壖我爲河中之泉君爲河中之青天天  
青青泉泠泠泉含青天天隔泉我思君兮心亦然心亦

然此心復在天之側我心爲風兮浙浙君身爲雲兮冪冪此風引此雲兮雲不來此風此雲兮何悠哉與我身心雙徘徊

將歸山招冰僧

買得一片田濟源花洞前千里石壁并一條流泌泉青松盤樛枝森森上插青冥天枝上有猿宿處近鶴巢清唳孤吟聲相交月輪下射空洞響絲篁成韻風蕭蕭我心塵外心愛此塵外物欲結塵外交苦無塵外骨泉有冰公心靜見真佛可結塵外交占此松與月

酬願公雪中見寄

積雪三十日車馬路不通貧病交親絕想憶唯願公春

鳩報春歸苦寒生暗風簷乳墮懸玉日脚浮輕紅梅柳意却活園圃冰始融更候四體好方可到寺中

苦雪寄退之

天生二月行時令白銀作雪漫天涯山人門前徧受賜平地一尺白玉沙雲頽月壞桂英下鶴毛風剪亂參差山人屋中凍欲死十樹萬樹飛春花菜頭出土膠入地山莊取粟埋却車冷絮刀生削峭骨冷齏斧破慰老身病妻烟眼淚滴滴飢嬰哭乳聲啾啾市頭博米不用物酒店買酒不甯賒聞道西風弄劒戟長堦殺人如亂麻天眼高開欺草芽我死未甯興嘆嗟但恨口中無酒氣劉伶見我相揄挪清風攪腸筋力絕白衣壓屋梁柱斜

聖明有道 命漢可得再見朝日  
邪柴門沒脛晝不掃  
黃昏遶樹棲寒鴉  
唯有河南韓縣令  
時時醉飽過貧家

寄贈含曦上人

楞伽大師兄 誇曦識道理  
破鑠推多關 高辯果難揣  
論語老莊易 搜索神鬼起  
信中百門敲 骨得佛髓  
此外雜經律 泛讀一萬紙  
高殿排名僧 執卷坐纍纍  
化物自一心 三教齊發起  
隨鍾嚼宮商 滿口文字美  
商賈女郎輩 不曾道生死  
縱遭彊禮拜 雅語不露齒  
劈破天地來 節義可屈指  
季展卽此僧 孤立無倚  
依倚近來愛 作詩新奇  
頗煩委忽忽 造古格削盡  
俗綺靡 假如慵裏頭 但勤讀書史  
切磋併工夫 休遠不可比  
憐僧無遠信 佛殊未

已兒古饒風情清 論興豐豐訪余十數度  
相去三五里見時心亦喜 不見心亦喜  
見時談謔樂四座 盡角响不見養天和  
無人聒人耳 昨朝披雪來 面色赤鞞鞞  
封竈養黃金 許割方寸匕 泥丸佛 教恒化莊亦恥  
未達不敢嘗 孔子疑季子 藥成必分余  
余必投泥裏 不如向陽堂 撥醅泛浮蟻  
麴米本無憊 酒成是法水 行道不見心  
毀譽徒云爾 雪晴天氣和 日光弄梅李  
春鳥嬌關關 春風醉旒旒 道上正無塵  
人家有花卉 高僧有柱杖 願得數觀止

聽蕭君姬人彈琴

彈琴人似膝上琴 聽琴人似匣中絃  
二物各一處 音韻

何由傳無風質氣兩相感萬般悲意方纏綿初時天山  
之外飛白雪漸漸萬丈澗底生流泉風梅花落輕揚揚  
十指乾淨聲涓涓昭君可惜嫁單于沙場不遠只眼前  
蔡琰薄命沒胡虜鳥梟啾唧啼胡天關山險隔一萬里  
顏色錯漠生風烟形魄散逐五音盡雙娥結草空嬋娟  
中腹苦恨杳不極新心愁絕難復傳金樽湛湛夜沈沈  
餘音疊發清聯綿主人醉盈有得色座客向隅增內然  
孔子怪責顏回瑟野夫何事蕭君筵拂衣屢命請中廢  
月照書窗歸獨眠

蜻蜓歌

黃河中蜻蜓其力小犯險無溺

黃河中流日影斜水天一色無津涯處處驚波噴流飛

雪花篙工楫師力且武進寸退尺莫能度吾甚懼念汝  
小蟲子造化借羽翼隨風戲中流翩然有餘力吾不如  
汝無地無羽翼吾若有羽翼則上叩天關爲聖君請賢  
臣布惠化於人間然後東飛浴東溟吸日精撼若木之  
英紛而零使地上學仙之子得而食之皆長生不學汝  
無端小蟲子葉葉水上無一事忽遭風雨水中死

出山作

出山忘掩山門路釣竿插在枯桑樹當時只有鳥窺窬  
更亦無人得知處家僮若失釣魚竿定是猿猴把將去

寄崔柳州

使者立取書疊紙生百憂使君若不信他時看白頭三

百六十州剋情惟柳州柳州蠻天末鄙夫嵩之幽花落  
隴水頭各自東西流凜凜長相逐爲謝池上鷗

贈稚禪師

春風滿禪院師獨坐南軒萬化見中盡始覺靜性尊我  
來契平生目擊道自存與師不動游游此無迹門

送好約法師歸江南

杯度度一身法度度萬民爲報江南三二日這回應見  
雪中人

蕭二十三赴歙州婚期二首

淮上客情殊冷落蠻方春早客何如相思莫道無來使  
迴鴈峯前好寄書

其二

南方山水生時興教有新詩得寄余路帶長安迢遞急  
多應不逐使君書

掩關銘

蛇毒毒有形藥毒毒有名人毒毒在心對面如弟兄美  
言不可聽深於千丈坑不如掩關坐幽鳥時一聲

盧仝詩外集

玉川子詩主於奇怪而語句混成與唐之諸家不類其茶歌月蝕二篇尤為世所傳誦昔之評詩者謂天地間不可無此則玉川詩之可愛者正以其怪耳予家藏宋刻本最為完善因壽之梓與騷壇之好奇者共

逢病軍人 以下四首見全唐詩

行多有病住無糧萬里還鄉未到鄉蓬鬢哀吟古城下不堪秋氣入金瘡

山中

飢食松花餠渴飲泉偶從山後到山前陽坡軟草厚如織困與鹿麕相伴眠

除夜

衰殘歸未遂寂寞此宵情舊國餘千里新年隔數更寒猶近北峭風漸向東生惟見長安陌晨鐘度火城殷勤惜此夜此夜在逡巡燭盡年還別雞鳴老更新儼聲方去病酒色已迎春明日持杯處誰為最後人

殊不似玉川下皆同



Table with 12 vertical columns and 1 row, currently empty.

